

UTAMA

# BAKAL ALUMNI DIRAIKAN - MAJLIS DI AMBANG SISWAZAH



Tanggal 10 April 2008, Jabatan Hal Ehwal Pelajar & Alumni telah menganjurkan Majlis Di Ambang Siswazah bertempat di Dewan Kapitol, UniMAP. Program ini merupakan salah satu program yang dirangka khas sebagai satu aktiviti interaksi dua hala antara pihak pengurusan tertinggi universiti dengan mahasiswa tahun akhir. Di samping itu, program ini dilihat sebagai platform untuk memberi peluang dan ruang kepada mahasiswa meluahkan perasaan penghargaan terhadap universiti tercinta ini yang mana merupakan institusi gedung ilmu selama empat tahun mereka berkampung dan menimba ilmu.



Majlis tersebut bermula dengan acara majlis makan malam para pelajar tahun empat bersama Naib Canselor dan Pegawai-pegawai Utama Universiti. Selesai jamuan majlis diteruskan dengan ucapan dari Saudara Syed Akhmal B. Syed Jamalil selaku wakil pelajar tahun empat dan juga merupakan Mantan Majlis Perwakilan Pelajar bagi Sesi 2005/2006.

Kemuncak kepada Majlis Di Ambang Siswazah ini adalah kesudian Y. Bhg. Kol. Prof. Dato' Dr. Kamarudin Hussin, Naib Canselor untuk menyempurnakan majlis perasmian dan seterusnya menyampaikan amanatnya. Dalam amanatnya, beliau menyeru kepada semua pelajar yang hadir untuk bermuhasabah diri dan menyingkap kembali segala pengorbanan universiti kepada pelajar dan balasan pelajar kepada universiti. Malahan dalam amanat beliau juga turut menyampaikan beberapa pesanan kepada semua bakal alumni untuk:

- Bangkit sebagai alumni yang berguna kepada universiti;
- Menjadi anak yang berguna kepada ibubapa;
- Menjadi pelajar yang berguna dan menghargai jasa guru dan pensyarah;
- Menjadi masyarakat dan rakyat yang berguna kepada Negara;
- Jadilah "Insan Kamil" yang mendokong cita-cita Negara dan
- Membudayakan kecemerlangan dalam diri

Satu perkara yang menariknya dalam majlis ini adalah setiap pelajar tahun akhir yang hadir memakai reben berwarna biru yang bertatahkan manik yang berbentuk hati sebagai satu simbolik kepada luahan rasa hati yang membawa maksud "SORRY • THANKS • SUPPORT". Ketiga-tiga perkataan ini dipilih sebagai tanda sokongan, rasa terima kasih dan semangat kecintaan mereka kepada pihak pengurusan universiti. Majlis diakhiri dengan penyampaian cenderahati dari pelajar tahun akhir kepada Y. Bhg. Dato' Naib Canselor.